

Hirukoak Nafarroako politikagintza berrituko duela agindu du Otanok

Lehendakariak PSN-CDN-EA koalizioaren programa azaldu du Parlamentuan

PSN-CDN-EA koalizio gobernua politikagintza berrituko duela agindu du Otanok. Lehendakariak PSN-CDN-EA koalizioaren programa azaldu du Parlamentuan, Nafarroako gobernuburua izendatzeko lehen saioan.

A. UNANUE / IRUÑEA

Nafarroako Gobernuak lehen aldiz izendatzeko prozedura hasierak ez zuen ikusmin handirik sortu, jakina baita dena aldez aurretik lotuta dagoela. Aurreneko aldiz, koalizio gobernu bat osatuko da Nafarroan eta gobernuburua ez dute prozedura automatikoaren bidez izendatuko, gehiengoak baizik. Hori larunbatean gertatuko da. Javier Otano PSN-CDN-EA hirukoaren hautagaiak orduan beregarnatuko du lehendakari kargua, Izquierda Unidaren abstentzioaren laguntzaz.

Gauzak honela, atzoko ekitaldiak protokolo kutsu nabarmena izan zuen. Ustegabeko gertaera bakarra Herri Batasunako parlamentariena izan zen. Talde horretako lau parlamentariak (Floren Aoz ez zegoen) 'Euskal Herria Askatu' zioten pegatinak itsatsi zituzten euren eserlekuaren aurrealdean. Lola Eguren Parlamentuko lehendakari berriak pegatinak kentzeko eskatu zion ekitaldi hasieran, baina Patxi Zabaletak ezetz erantzun zion, beraien «adierazpen demokratiko bat» zela argudiatuta. Eguren bereari eutsi zion, Parlamentuko araudiak halakorik ez duela baimentzen esanez. «Ezta debekatzen ere. Esango al zeniguke araudiaren zein artikuluk debekatzen duen Euskal Herriaren askatzea eskatzea?», ihardeusi zion Zabaletak. Azkenean plenoaren etean eta pegatinak kentzeko agindu zion Egurenen foruzainei. HBko parlamentariak ez zuten eragozpenik jarri, baina Parlamentutik atera ziren, protesta moduan.

«INTEGRATZAILEA ETA BERRITZAILEA» Gertaera horren ondorioz, Otanok ordu laurdeneko atzerapenarekin hasi zuen bere azalpena. Lehendakariak sozialistak ia hitzez hitz leitu zuen PSNk, CDNk eta EAK Sanferminetako jaien aurretik hitzartutako programa. Egitarau hori, Otanoren arabera, integratzailea da eta egonkortasuna emango dio Nafarroako Gobernuari.

Hirukoaren hautagaiak Nafarroako politikagintza berritzeko premia azpimarratu zuen. Halaber, aurrerantzean politikagintza egiteko bestelako moduak bultzatuko dituztela hitz eman zuen Otanok: «Adostasuna bilatuko dugu elkarriketaren bidez eta gardentasuna bermatuko dugu, orain arte antzeman ditugun zinkeriak garbituz eta kontrola areagotuz. Horrela, inork ezingo du politikagintza bere interes pertsonalen edota bere alderdieraren mesedetan erabili, ezta iruzur egiteko ere». Honi lotuta, kontratazio lege berri bat tajutu, alderdi politikoen finantzaketa kontrolatu eta ikerketa batzordeen osaketa errazteko konpromezua hartu zuen.



Nafarroako hurrengo gobernuaren helburuak eta konpromezuak azaldu zituen Otanok.

OSKAR MONTERO

derdi politikoen finantzaketa kontrolatu eta ikerketa batzordeen osaketa errazteko konpromezua hartu zuen.

Era berean, autogobernua sendotu, EAErekiko harremanak hobetu eta euskararen erabilera bultzatzeko asmoa azaldu zuen Otanok. Honek esan zuenez, koalizio gobernuak Nafarroako hizkuntza, kultur, eta gizarte aniztasuna integratzeko ahaleginak egingo ditu.

Indarkeriari dagokionez, hiruko Gobernuak irmotasunez jokatu duela, baina aldi berean

elkarriketaren bidez distentsio soziala lortzen saiatuko dela adierazi zuen. Otanoren arabera, «euren helburuak lortzeko indarkeria erabili behar ez duela baztertzen dutenak bakarrik geldituko dira integrazioetik kanpo».

Gaur PSNko lehendakariak azaldutako asmoei erantzuteko parada izango dute alderdi politikoei. CDNren eta EAREN aldetik ez da kritika handirik espero, alderdi horiek partehartze zuzena izan baitute Otanok defenditutako programari; bai, ordea, UPNren eta HBren partetik. Eztabaidaren ondoren lehendakariak gehiengo absolutua behar duenez, Otanoren kandidaturak ez du aurrera egingo (hirukoaren 23 botoak bakarrik izango ditu alde). Etzi beste bozketa bat egingo dute, hau ere alferrikakoa, eta larunbatean hirugarrena. Horretan gehiengo soila nahikoa denez, Otano Nafarroako gobernuburu izendatuko dute.

Sanz: «Barregarria izan da, ez du ezer zehaztu»

A. U. / IRUÑEA

Miguel Sanz UPNko zerrendaburuak oso gogor kritikatu zuen Javier Otanoren diskurtsoa. «Haserretzeko modukoa izan da, zeharo hutsala eta edukirik gabekoa, orokortasunez betea. Ez du ezer zehaztu, barregarria izan da, Felipe Gonzalezek egin ohi duenaren kopia txar bat. Eta jakina da Gonzalezek ezer esan gabe hitz egiteko trebetasuna daukala. Horixe egin du gaur Otanok. Ez dut zenbaki bakar bat aditu, ezta zehaztapen bakar bat ere, eta berrikuntza gisa saldu dizkigun proposamenak Nafarroaren nortasunaren aurkakoa direla iruditzen zait», adierazi zuen Sanzek.

Oso urduri, UPNko agintariak ez zuen ezkutatu hauteskunderen zerrenda bozkatuena izan arren oposizioan gelditu izanak eragin dion haserre. «Gure alderdia, maiatzaren 28an 93.000 nafarren konfiantza jaso zuena, erabat baztertu dute Gobernua osatzerakoan. Beraz, alferrik ari dira orain elkarriketa eta adostasun eske», erantzun zuen Sanzek koalizio gobernuari laguntzeko prest ote dauden galdetu ziotenean.

Felix Taberna IUko ordezkariak «protokolozko» iritzi zion Javier Otanoren diskurtsoari, baina, hala ere, politikagintza egiteko modua berritzeko konpromezua pozgarria zela azpimarratu zuen.

PUNTUZ PUNTU

Helburuak eta konpromezuak

Hona hemen Otanok aurkeztutako programan agertzen diren zenbait helburu eta horiek lortzeko konpromezu jakinak.

- **EUSKAL KULTURA ETA EUSKARA:** Gobernuak Nafarroaren nortasun kulturala sendotuko du eta arreta berezia eskainiko die euskarari eta bertako kultur adierazpenei. Horretarako, Euskararen Legea aldatuko du, euskarazko irakaskuntza Nafarroa osora zabaltzeko asmoz, eta euskarazko irratien legezkatzea bultzatuko duela hitz eman du.
- **EAE-REKIKO HARREMANAK:** Euskal Autonomi Elkartarekiko harremanak hobetzeko Hegoaldeko bi gobernuen arteko batzorde iraunkorra eratuko dute. Hego Euskal Herriko lau herrialdeetan eragina duten gaietan garapen bateratua gauzatzen saiatuko da aipatu batzordea.
- **ENPLEGUA:** Koalizio gobernuak enplegua sortzea izango du lehen helburu. PSN-CDN-EA hirukoak lanpostuak sortzeko plan bat tajutuko du.
- **NAFARROAKO UBIDEA:** Otano lehendakariak Itoizko urtegia bukatu eta Nafarroako Ubideari lehentasuna emango diotela esan zuen, herrilari hori herrialdeko erdialdea eta hegoaldea ureztatzeke ezinbestekoa delakoan.
- **INTSUMISIOA:** Koalizio gobernuak «kezka» azaldu du Nafarroako intsumisioaren egoeratik, Justizia herrialde honetan gainerakoetan baino gogorrago jokatzen ari omen delako. Halaber, intsumisioak askatzeko eta kartzela zigorrak kentzeko eskatuko dio Madrilgo Gobernuari.
- **ABORTOA:** Gaur egungo legegiaz abortuari buruz agintzen duena Nafarroan ere bete egingo dela bermatuko duela dio PSN-CDN-EA hirukoak. Egun Nafarroan ez da abortorik egiten ez sare publikoan ezta pribatuan ere.



AYUNTAMIENTO DE PAMPLONA
IRUÑEKO UDALA



UDAKO EUSKAL UNIBERTSITATEA - DIRU LAGUNTZAK

Larraona ikastetxean egingo diren Udako Euskal Unibertsitatearen ikastaroetan parte hartu nahi duten Iruñearrek diru laguntza jaso ahal dute:

- Eskakizunak egingo dira Uztailaren 3tik Abuztuaren 18ra arte Udal Erregistro Nagusian.
- Iruñeko erroldan egotearen ziurtagiria.
- U.E.U.ren ikastaroetan parte hartuaren egiaztagiria.
- Diru laguntza matrikularen kostuaren %25ekoa izanen da.

HIRITAR ERAGINTZA ARLOA

